

ENTREPRENEUR ARUBIANO TA MANEHA DOS COMPANIA

LANTANDO VUELO CU DESTINACION EXITO

Dia 20 di April 2007 a habri un otro aeropuerto na Aruba, na e banda pazuid di nos aeropuerto actual. Un joya di edificio pa sirbi un mercado den crecimiento, esta esun di doñonan di avionnan priva, business jets y nan servicio. Claudio Stamper (41) conhuntamente cu su team na Universal Aviation Aruba por tabata hopi orguyoso di nan logro, pero nan no tabata semper den un edificio bunita asina.

Conoci pa su habilidad y servicio na un edad hopi jong, Claudio Stamper a lanta su prome compania yama Jet International NV y a cuminsa sirbi varios di e aerolinean grandi. Su trabou entre otro tabata haci mantencion y ora necesario reparacion na e avionnan di e aerolinean cu tabata pasa aruba, pero su pasion pa aviacion ta cuminsa mas trempan.

Tempo cu e ta mucha naturalmente e tabata gusta avion, su tata tabata hibe na e aeropuerto bieu pa mira avionnan lanta vuelo y ateriza. Su prome pensamiento tabata cu e kier bira un 'fighter pilot'. Mientras cu ela bay

ta creciendo y studiando e posibilidad, el a ripara cu su ambicion no tabata den su man y cu mericanonan ta bin na prome lugar pa e poco puestonan habri na Merca. Despues di college na Merca el a dicidi di sigui specializa y a haya oportunidad na e George T. Baker Aviation School. Aki el a cuminsa haya un amor pa un otro aspecto di aviacion esta su mantencion y reparacion. El a specialisa como 'Aircraft Maintenance Technician' y despues di a completa su estudio a traha na diferente aeropuerto Mericano pa gana experiencia. Cu tempo el a bolbe su isla pa bay traha pa American Airlines. Despues di mira companianan di afo ta duna e servi-

cio di mantencion, ela opta pa habri e prome compania Arubano di mantencion y reparacion di avion cu yama Jet International NV, keto bay e compania compania ta duna servicio awendia na Jet Blue, United, Aserca, US air, Continental y otronan. E no tin nod'i haci propaganda, su nomber ta bon conoci cerca esnan cu mester di e servicio.

Na 2002 pa casualidad e doño di Universal Weather & Aviation Inc. a pasa Aruba pa un 'fuel stop' y Claudio su servicionan tabata rekeri pa un reparacion. El a mantene contacto, a sigui explora e posibilidadnan y despues a bira socio cune den e compania cu ta opera e facilidad na Aruba. **Bo tin cu mira e edificio aki como un regalo pa Aruba, ya cu apesar cu e ta un inversion di 1.2 miyon dolar, cu tempo Aeropuerto lo bira doño di e edificio, pues e lo keda como algo cu pueblo por ta orguyoso di dje.** Universal no a haya e derecho facil, na 2004 for di 20 otro interesado, nan a keda selecciona.

Tin 16 persona ta dunando servicio di e calidad mas halto na e sitio y nan ta getrain pa atende, executivonan, funcionario halto y gobernante di tur pais, doñonan di compania grandi, enfin tur hende cu pasa aki ta hiba un bon impresion di Aruba. E terminal yama un 'General Aviation Terminal'



“E FACILIDAD COMBINA CU ARUBA SU LOCACION STRATEGICO DEN RELACION CU SUR-AMERICA Y CARIBE LO PERCURA PA ARUBA SU AVIACION GENERAL SIGUI CRECE PAREU CU SU CRECIMIENTO ECONOMICO”

cu ta diferencie for di aviacion comercial. Paden matanan tropical y arte contemporaneo di artistanan local ta cuminda bishitantenan.

No ta semper e personal tabata den un edificio di luho asina. Na 2005 tempo cu a cuminsa duna e servicio, nan tabata ubica den un trailer, na e parti pazuid, net na e sitio na unda e aeropuerto bieu tabata, na unda Claudio tabata mira avion ta lanta. Nan sacrificio awendia tin su fruto. **Cu e terminal y servicio aki Aruba a habri un porta pa un mercado cu ta creciente, e ta complementa e servicio na e Aeropuerto pa aviacion comercial y nos ta gradecido na gerencia di aeropuerto, na douane, inmigracion y tur otro**

departamento cu a contribui na haci e facilidad aki un exito. Sr.Stamper ta papia di exito, ya cu movicion di avionetanan ta muestra un aumento di 20% den e prome tres luna di 2007 y ta muestra cu esaki lo continua of hasta lo por subi mas.

Cu dos compania pa maneha Sr.Claudio Stamper su dianan ta largo, pero e tin e satisfaccion di sa, cu conhuntamente cu su team, nan ta duna un servicio na nivel mundial. Ta duna servicio 24-ora pa dia y e terminal ta inclui un duty free shop, parkeo amplio, un pilot- y VIP lounge, servicio di adouana y inmigracion. Entre otro e servicio cu nan ta duna ta percura pa coordina transportacion, nan ta

handle e gastonan di aeropuerto, catering, e mantencion, planea vuelo, e combustibel y nan ta vigila y coordina e situacion di tempo pa esnan cu ta saliendo. **E facilidad combina cu Aruba su locacion strategico den relacion cu Sur-America y Caribe lo percura pa Aruba su aviacion general sigui crece pareu cu su crecimiento economico.** Nos a set e standard pa terminalnan di aviacion general den nos region. **Tin hopi espacio pa crecimiento y nos ta sigur cu e trend lo sigui,** Stamper ta bisa cu orguyo.

Nos semper ta tende e expresion cu nos turismo tin cu diversifica y e 'General Aviation Terminal' aki, sigur ta contribui na haci esey un realidad.